

2 Tesalonicenses

Paulo cūhũ joarocaha Jesu yainare Tesalónica macainare

1 1 Yũhũ Paulo, Silvano, Timoteo cūhũ ahrire mūsare joarocaja tjoa. Mũsa sehe Tesalónica macaina mari Pũcũ Cohamacũ yaina jira. Mari pũhtoro Jesucristo yaina cūhũ jira mũsa. **2** ã jina Cohamacũ mari Pũcũ, mari pũhtoro Jesucristo mehne mūsare noa dutija. Cohamacũ yoadohoa mehne noano jiga mũsa.

Ahri yahpapũre Cristo tjua taro buhiri dahrerohca

3 Cohamacũre sinina Jesure mũsa wacũ tuaare wacũna “Noabiara sãre”, nirucuja sã Cohamacũre. Sã ã nichũ noa nina. Dachoripe Cohamacũre mũsa noano wacũ tua namona niyuhca. ã yoana dachoripe mũsa mehne macainare cahĩ namona niyuhca mũsa. ã jichũ Cohamacũre “Noabiara sãre”, sã nichũ noa nina. **4** Paina mūsare ñano ti yoapachũta Jesure wacũ tuarucuyuhca mũsa mipũ cūhũre. ã yoa tirore wacũ duhuerayuhca. Mũsa ã yoachũ ñũna tíre mũsa yoarire paina Cohamacũ yainare wahchea mehne yahuja sã. **5** ã wacũ tuarucuna Cohamacũ mari pũhtoro yaina mũsa jiri buhiri ñano yũhdũna niyuhca mũsa. ã jiro pũhtoro Cohamacũ to sũho jiropũre waha dutira mūsare. To ã dutichũ to quihõno yoariro jichũ masija mari.

6 ã yoa Cohamacũ quihõno yoariro jira. ã jiro mūsare ñano yũhdũchũ yoaina sehere ñano yũhdũchũ yoarohca tiro. **7** ã yoaro mũsa ñano yũhdũrina cjiri jichũ tiro mūsare noano jichũ yoarohca. Sã cūhũre noano jichũ yoarohca. Mari pũhtoro Jesu to yaina anjoa tuaina mehne, picha pohna mehne mũanopũ bajuaro noano jichũ yoarohca marine, ñano yũhdũrina cjirire. **8** ã yoa Cohamacũre masierainare, mari pũhtoro Jesu to buheare noaa buheare yũhdũrucarinare Cohamacũ buhiri dahrerohca. **9** Cohamacũ tinare õ sehe buhiri dahrerohca: Pichacarpũ tina ñano yũhdũrucuahca. ã jia tina tuariro mari pũhtoro Jesu cahai ne ji masierara. ã jia tua yũhdũariro to jiare ñũsi tina. **10** ãta waharohca tí dachoi Jesu

to tjua tahti dachoi. Tí dachoihta tiro tarohca noaina tirore wacū tuaina “Noariro, tuariro jira Jesu”, ni wahchea mehne ti ño payohto cjihtore. Mūsare sã buherire mūsa noano tũhore. (Ã jina mūsa cũhũ tiro mehne jinahca.)

11 Ã jina Cohamacũre ã sini payorucuja sã mūsa ya cjihtire. Õ sehe ni Cohamacũre sini payoja sã: To cahmano seheta yoahinare mūsare to cūriro seheta mūsa jihtina cjihtire sini payorucuja sã mūsare. Mūsa noaina ji duanata niyuhca. Ã jina Cohamacũ to tuaa mehne noaina mūsa ji duariro seheta mūsa jihti cjihtire sini payorucuja sã. Mūsa Cohamacũre wacū tuayuhca. ã wacū tuana to yare yoayuhca mūsa. Tíre mūsa noano yoa namohti cjihtire Cohamacũre sini payorucuja sã mūsare. 12 Å yoana mari pũhtoro Jesucristore painare ño payochũ yoanahca mūsa. Mūsa ã yoachũ Jesucristo yaina mūsa jichũ ñũa paina ño payoahca mūsare. Cohamacũ to cahĩa mehne, mari pũhtoro Jesucristo cũhũ to cahĩa mehne ã waharohca.

Ñano yoarucurirore yahuha Paulo

2 ¹ Mipũre mari pũhtoro Jesucristo ahri yahpapũre to tjua tahtore, tirore mari cahmachu mari piti bocahtore yahu namo duaja yũhũ. Õ seheta tuaro yahu duaja mūsare, sã coyeya: ² Paina mūsare ò sehe niboca: “Mari pũhtoro to tjua tahti dacho, pihitiri dacho jiropũ nina”, niboca mūsare. Ti ã nichũ tũhona, tũho cũaena tjiga. Å yoa tũho wisiena tjiga. “Cohamacũ yũhũre ãta niri jire”, niboca mūsare paio. Pairo cũhũ mūsare buhero ãta niboca. Pairo cũhũ ãta ni joarocaboca, “Yũhũ Paulo tjija”, ni mahño joarocaró. ³ Paina mūsare ti ã mahñochũ tũhoena tjiga mūsa. Tí dachoi ahri yahpa to pihitiro panocã payũ masa Cohamacũre duhuahca. Å jiro tí dachoi ñano yoarucuriro pichacapũ wahahtiro bajarohca jipihtina ti ñũhtiro cjihtore. ⁴ Tiro Cohamacũ warore, paina bajaraina masa ti ño payoina cũhũre jipihtina masare ño payo dutisi ñano yoarucuriro. Tiro ò sehe ni tũhoturohca. “Ahrina jipihtina bui pũhtoro jija yũhũ”, ni tũhoturohca. Å jiro Cohamacũ wũhũi dujiro “Yũhũ sehe Cohamacũ jija”, ninohca.

⁵ Mūsa mehne jisinicũ tíreta yahui. ¿Tíre wacũerajari mūsa? ⁶ Mipũre paio sehe ñano yoarucurirore ne ji dutierasinina. Å yoa tirore ji dutierarirore masina mūsa. Tiro sehe to dutichũ to quihõri dacho jichũ ñano yoarucuriro bajarohca. ⁷ Mipũre masa ti ñũenoi tiro yoaro seheta paina ñaare yoa tuhsũra. Ti ã

yoapachuta ñaare yoa dutierariro to wahahto pano tiro ñano yoarucuriro sehe jisi. **8** To wahari baharo pinihtare ñano yoarucurirota bajuarohca. Baharo mari pũhtoro Jesucristo tirore yũhdũrucarohca. Ahri yahpapũ to si sitea mehne tjua taro, to dũsero mehne putirocaro, tirore wajã boarohca. **9** Ñano yoarucuriro sehe watĩno tuaa mehne taro, payũ bajuamehnerire, mahñoa bajuamehnerire yoa ñonohca. **10** Payũ ñaa to yoa ñoa mehne to ã mahñochũ pichacapũ wahahtina sehe tirore tũhoahca. Tina sehe noaa buheare cahmaerare. Ti ã cahmaerachũ Cohamacũ tinare pichacapũ wahahtinare yũhdosi. Tina pinihta ñano yoarucuriro mahñoriro to yoarire “Potocã tjira”, niahca. **11** ã jiro noaa buheare ti cahmaerari buhiri Cohamacũ tinare wisiomehnenohca. ã wisiaa mahñoare cahmaahca tina. **12** ã jiro jipihtina noaa buheare tũho duaerainare, ñaa dihtare yoa ji coainare tirota buhiri dahrerohca.

**“Cohamacũ mũsare beseha to yaina
jichũ yoaro taro”, ni yahuha Paulo**

13 Mũsa sã coyey, mari pũhtoro Jesu to cahĩina jira mũsa. Dóiputa wahmanopũreta mũsare pichacapũ wahaborinare to yũhdohtina cjihtire Cohamacũ beseri jire mũsare. Mũsare beseri jire Espĩritu Santo to tuaa mehne to yaina ñaa marieina mũsare jichũ yoaro taro. ã jiro noaa buheare “Potocã tjira”, nihtina mũsa jichũ ñũno mũsare beseri jire. To ã beserina mũsa jichũ ñũna Cohamacũre wahche, “Noana”, nirucuja sã. **14** Noa buheare mũsare sã buhechũ Cohamacũ mũsare beseri jire mari pũhtoro Jesucristo to masa mũjariro seheta mũsa cũhũ mũsa masa mũjahto cjihtore.

15 ã jina yũ coyey, noano wacũ tuaina jiga mũsa. ã jina sã durucua mehne sã joarocaa pũri mehne mũsare sã buherire noano wacũga mũsa. ã yoa tí buheare yũhdũrucacena tjiga.

16 Mari pũhtoro Jesucristo to basi, Cohamacũ mari Pũcũ cũhũ marine cahĩa, jipihtia dachoripe marine wahchechũ yoare.

Marine cahĩa marine pichacapũ wahaborinare yũhdoahca. ã jina Cohamacũ to yũhdohtore noano masina wahcheja mari.

17 Jesucristo, mari Pũcũ mehne mũsare noano yoajaro pjĩro mũsa wahchehto sehe. ã yoa jipihtia noaare mũsa yoahito sehe, mũsa noano durucuhto sehe Cohamacũre mũsare sini payoja.

**“Sã ya cjihtire Cohamacure sini payoga”,
ni joaha Paulo cũhũ**

3 ¹ Mipũ sã coyea, sã ya cjihtire Cohamacure sini payoga mari pũhtoro Jesu to buhea payũ masare sã buhehto sehe. To buheare mũsa noano cahmariro seheta paina cũhũ tí buheare ño payoa mehne ti cahmahto sehe sini payoga mũsa Cohamacure. ² Cãinata Jesure wacũ tuara. Paina sehe to yare tũho duaeraa, Jesure wacũ tuaerara. ã jina ñaina masa sãre ti ñano yoa duachũ Cohamacure sini payoga mũsa sãre to yoadohohto sehe. ³ Mari pũhtoro Jesu to niriro seheta yoariro jira. ã jiro mũsare tirore wacũ tuachũ yoarohca. ã yoa tuhsũ, wafĩno mũsare to ñano yoa dutichũ tiro mũsare yoadohorohca. ⁴ Cohamacũ mũsare to yoadohorire masija sã. ã jina mũsare sã dutiriro seheta mũsa yoachũ cũhũre masija sã. ã yoa ãta yoarucunahca mũsa. Tí cũhũre masija sã. ⁵ Cohamacũ mũsare to cahĩare mũsare masichũ yoajaro. ã jina Cristo yoaro sehe ñano yũhdũpanahta cũno pjaina jichũ yoajaro mũsare mari pũhtoro.

Marine tuaro dahraro cahmana

⁶ Jesucristo mari pũhtoro to dutiro mehne õ sehe ni dutija mũsare: Jesu yainare dahra duaerainare, mũsare sã buheriro seheta yoerainare, tinare piti tiena tjiga. ã ñũnocahga tinare. ⁷ Sohõ jiri pja mũsa mehne sã jichũ tuaro sã dahrachũ ñũre mũsa. ã jina sã yoariro seheta mũsa cũhũre dahraro cahmana. Tíre noano masina mũsa. ⁸ ã jina mũsa chũare wapa marieno chũerahi sã. ã yoa dachopũre, ñamipũ cũhũre tuaro dahrai sã “Mũsa chũare sã siniri”, nina. ⁹ Sã buheri wapa mũsare wapa cahmaboa sã. ã wapa cahmaborina jipanahta wapa cahmaerana tuaro dahrai sã, mũsa sehe sãre mũsa ñũ cũhto sehe. ¹⁰ Mũsa mehne jina, õ sehe ni buhei mũsare: “Dahraeraina chũea tjijaro”, ni buhei sã mũsare. ¹¹ Cãina mũsa mehne macaina ne dahra duaerayuhca. ã dahra duaeraa, painare ã yahu wajamacanoca, caribobiaro yoayuhca tina. ¹² Mari pũhtoro Jesucristo to dutiro mehne ã dahra duaerainare õ sehe nija: Noano wahchea mehne dahrajaro tina ti noano jihto sehe, ti ya chũare ti chũhto sehe.

¹³ Sã coyea, mũsa sehe noaare yoarucuna pumena tjiga.
¹⁴ Cãina tó macaina ahrire sã joarocarire yũhdũrucaboca. Ti ã

yoachũ ti yoarire noano ñũga. Ñ ñũna tinare piti tiena tjiga ti bũoro wahahto sehe. **15** Ñ piti ti duhupanahta tinare ñũ tuhtiena tjiga. Tina mũsa coyey, Jesu yaina tjira. Ti ã jichũ ti yũhdũrucarire yahuga tinare tíre ti yoerahto sehe.

Paulo tinare noa duti batoaha

16 Mari pũhtoro Jesu marine noano jichũ yoariro mehne dachoripe noano jirucuga mũsa. Ñ jicũ “Mari pũhtoro mũsa jipihtina mehne jirucujaro”, nicũ mũsare noa dutija.

17 Yũhũ Paulo, yũ wamomaca mehmeta mipũre yũ basita joa batoai nija: Ñ joacũ mũsare noa dutija. Jipihtia yũ joarocaa pũrine õ sehe dihta yũ wamomaca mehne joa batoaja yũhũ. Yũ õ sehe dihta yũ joa batoachũ ñũna yũ joarocari pũ to jichũ masinahca mũsa. **18** Mari pũhtoro Jesucristo to cahĩa mehne noano yoajaro mũsare jipihtinare.